

**UDRUŽENJE GRAĐANA
«INTERKULTURNI SUSRETI U BOSNI I HERCEGOVINI»**

S T A T U T

**UDRUŽENJA GRAĐANA
«INTERKULTURNI SUSRETI U BOSNI I HERCEGOVINI»**

Sarajevo, februar 2004. godine

Na osnovu članova 10 i 12 Zakona o udruženjima i fondacijama Bosne i Hercegovine («Službeni glasnik BiH», broj 32/01), osnivači na Osnivačkoj skupštini, održanoj 20.02.2004. godine u Sarajevu, usvojili su:

S T A T U T

UDRUŽENJA GRAĐANA «INTERKULTURNI SUSRETI U BOSNI I HERCEGOVINI»

OSNOVNE ODREDBE

Član 1.

«Interkulturni susreti u Bosni i Hercegovini» je nevladino, neprofitabilno udruženje građana, koje je osnovano zajedničkim sporazumom članova Udruženja, usvojenim na Osnivačkoj skupštini održanoj dana 20.02.2004. godine u Sarajevu, u skladu sa Zakonom o udruženjima i fondacijama Bosne i Hercegovine.

Član 2.

Ovim Statutom u skladu sa Zakonom uređuje se :

- puni i skraćeni naziv Udruženja i sjedište Udruženja
- ciljevi Udruženja
- postupak prijema i isključenja članova
- organi Udruženja
- javnost rada
- postupak za izmjenu ili dopunu Statuta i donošenja drugih opštih akata
- oblik i sadržaj pečata
- zastupanje Udruženja
- uslovi i postupak za pripajanje, razdvajanje, transformaciju ili prestanak rada Udruženja
- druga pitanja od značaja za organizaciju i djelovanje Udruženja.

I – NAZIV I SJEDIŠTE UDRUŽENJA

Član 3.

Puni naziv Udruženja je :

UDRUŽENJE GRAĐANA INTERKULTURNI SUSRETI U BOSNI I HERCEGOVINI
УДРУЖЕЊЕ ГРАЂАНА ИНТЕРКУЛТУРНИ СУСРЕТИ У БОСНИ И ХЕРЦЕГОВИНИ
UDRUGA GRAĐANA INTERKULTURALNI SUSRETI U BOSNI I HERCEGOVINI

Skraćeni naziv Udruženja je:

UG «ISU BIH»
УГ «ИСУ БИХ»
UG «ISU BIH»

Naziv na engleskom jeziku je:

«Intercultural meetings in Bosnia and Herzegovina».

Sjedište Udruženja je Sarajevo, Ul.Envera Šehovića 44/2.

Udruženje djeluje na cijelom području Bosne i Hercegovine.

Član 4.

Udruženje ima svoj znak. Znak Udruženja se sastoji od tri slova i to ISU, a gdje su slova I i U postavljena vertikalno i plave su boje, a u sredini je postavljeno slovo S i to horizontalno i žute je boje. Oko skraćenog naziva ISU kružno je ispisan naziv Udruženja na tri jezika i to bosanskom, srpskom i hrvatskom plave boje.

II – CILJEVI UDRUŽENJA

Član 5.

Ciljevi osnivanja Udruženja su organizovanje međunarodne razmjene učenika i nastavnika osnovnih i srednjih škola, te unaprjeđenja interkulturalnog obrazovanja na državnom i međunarodnom nivou.

Član 6.

Udruženje je osnovano radi ostvarivanja zajedničkih interesa članova Udruženja, bez namjere stjecanja bilo kakvog profita.

Osnovni ciljevi Udruženja su :

U svrhu ostvarivanja ciljeva propisanih članom 5. Udruženje obavlja sljedeće djelatnosti:

- organizovanje razmjene na državnom i međunarodnom nivou učenika i nastavnika osnovnih i srednjih škola radi razmjene iskustava, upoznavanja kultura, razvoja svijesti tolerancije;
- organizovanje seminara vezanih uz djelatnost Udruženja;
- organizovanje tribina, radionica, konferencija i simpozija;
- organizovanje informativno-izdavačke djelatnosti (štampanje brošura, biltena);
- unaprijeđenje obrazovanja na mjesnom i međunarodnom nivou;
- saradnja sa sličnim udruženjima u Bosni i Hercegovini i inostranstvu;
- saradnja sa organizacijama u Bosni i Hercegovini i u inostranstvu, koje se bave razmjenom učenika i nastavnika;
- saradnja u organizovanju kurseva;
- ostvarivanje drugih zajedničkih interesa članova Udruženja u skladu sa osnivačkim aktom i Statutom Udruženja.

Član 7.

Utvrđene ciljeve Udruženje ostvaruje na način određen zakonom, pravilnikom, ovim Statutom i drugim općim aktima Udruženja.

III - POSTUPAK ZA PRIMANJE I ISKLJUČIVANJE ČLANOVA

Član 8.

Osnivači Udruženja postaju i njeni članovi danom registracije Udruženja. Članom Udruženja se postaje dobrovoljnim pristupanjem fizičkih lica u Udruženje.

Članovi Udruženja mogu biti i pravna lica slične djelatnosti, koja su registrovana kod nadležnog organa, kao i udruženja građana i druge organizacije slične djelatnosti. Osnivači stiču svojstvo člana Udruženja danom registracije Udruženja.

Članovi Udruženja su lica, državljani BiH i strani državljani koji prihvataju Statut i druge opće akte Udruženja, te ciljeve Udruženja.

Član 9.

Udruženje može imati i počasne članove, a odluku o proglašenju za počasnog člana donosi Skupština Udruženja na preporuku Upravnog odbora u skladu sa Pravilnikom o dodjeli priznanja Udruženja.

Član 10.

Za članstvo u Udruženju se utvrđuje odgovarajuća članarina. Visinu članarine određuje Upravni odbor po ovlastima Skupštine svake kalendarske godine.

Član 11.

Članarina je obavezujuća za sve članove Udruženja i plaća se do kraja prvog kvartala svake godine, a visina i način plaćanja se regulišu posebnom odlukom.

Član 12.

Evidencija o članstvu se vodi u Udruženju.

Član 13.

Članovi Udruženja imaju sljedeća prava i obaveze:

- da biraju i budu birani u organe Udruženja;
- da aktivno učestvuju u ostvarivanju ciljeva Udruženja;
- da budu redovno i blagovremeno obavještavani o aktivnostima Udruženja;
- da čuvaju i podižu ugled Udruženja;
- da redovno plaćaju članarinu i izvršavaju druge preuzete obaveze;
- da ostvaruju druga prava i obaveze utvrđene Statutom i općim aktima Udruženja.

Član 14.

Članstvo u Udruženju prestaje:

- dobrovoljnim istupanjem;
- neplaćanjem članarine;
- odlukom disciplinske komisije Udruženja;
- prestankom pravnog subjektiviteta člana.

IV - UNUTRAŠNJA ORGANIZACIJA

Član 15.

Organi Udruženja su:

- Skupština;
- Upravni odbor;
- Nadzorni odbor.

SKUPŠTINA

Član 16.

Skupština Udruženja je najviši organ Udruženja koju čine svi članovi Udruženja.

Član 17.

Skupština Udruženja radi u sjednicama. Sjednice su redovne i vanredne. Redovne sjednice se održavaju najmanje jednom godišnje.

Vanredne sjednice se održavaju po potrebi, a mogu ih zatražiti Upravni ili Nadzorni odbor ili najmanje jedna trećina članova. Ako Predsjednik Skupštine ne sazove Skupštinu u roku od 60 dana, u slučajevima iz prethodnog stava, odluku o sazivanju Skupštine donijet će Upravni odbor.

Član 18.

Skupština punovažno odlučuje kada je sjednici prisutno više od polovine članova Skupštine. Za izbor organa, kao i usvajanje Statuta ili njegovih izmjena i dopuna, također je potrebno prisustvu više od polovine članova Skupštine.

Član 19.

Skupština Udruženja je nadležna za:

1. donošenje Statuta, izmjena i dopuna Statuta i drugih akata određenih Statutom;
2. odlučivanje o pripajanju, razdvajanju, transformaciji, raspuštanju i prestanku rada kao i o drugim statusnim promjenama u Udruženju;
3. izbor i razrješenje članova Upravnog odbora i drugih organa Udruženja;
4. razmatranje i odlučivanje o izvještajima koje podnosi Upravni odbor;
5. odlučivanje o ostalim pitanjima koja nisu stavljena u nadležnost drugih organa Udruženja.

Član 20.

Mandat članova Skupštine je dvije godine. Mandat člana Skupštine može prestati i prije isteka vremena na koje je izabran i to:

- ostavkom;
- opozivom ili zamjenom;
- pod uslovima propisanim Zakonom.

Član 21.

Rad Skupštine se reguliše Poslovníkom o radu Skupštine, kojeg usvaja Skupština na početku sjednice. Sjednicom Skupštine predsjedava Radno Predsjedništvo, kojeg bira Skupština na početku svog rada.

Član 22.

Članovi Skupštine imaju pravo i dužnosti:

- da podnose prijedloge akata i pokreću druga pitanja iz nadležnosti Skupštine;
- da postavljaju pitanja koja se odnose na rad organa Udruženja, radnih tijela i nosilaca funkcija Udruženja;
- da traže obavještenja i podatke koji su im potrebni za vršenje dužnosti članova u Skupštini;
- da izvršavaju odluke i zaključke Skupštine, njenih organa i radnih tijela, na način koji će doprinositi ostvarivanju ciljeva Udruženja u oblasti djelovanja.

Član 23.

Član Skupštine je dužan da redovno prisustvuje sjednicama. O prisustvu sjednicama vodi se evidencija.

Član 24.

Predsjednik Skupštine Udruženja:

- je istovremeno i predsjednik Upravnog odbora i u tom svojstvu predstavlja i zastupa Udruženje;
- saziva sjednice Skupštine i Upravnog odbora i rukovodi radom na sjednicama;
- stara se o zakonitosti rada Udruženja;
- vrši i druge poslove za koje ga ovlaste Skupština i Upravni odbor.

U slučaju spriječenosti predsjednika, zamjenjuje ga Zamjenik predsjednika, Sekretar ili član Upravnog odbora, koga ovlasti predsjednik ili Upravni odbor.

UPRAVNI ODBOR

Član 25.

Upravni odbor je izvršni organ Skupštine. Upravni odbor Udruženja čine:

- Predsjednik;
- Zamjenik predsjednika;
- Sekretar;
- ukupno 7 članova Upravnog odbora.

Mandat članova Upravnog odbora je 2 godine uz mogućnost reizbora. Upravni odbor može svojom odlukom imenovati operativno tijelo za djelovanje u uslovima dnevnih i vanrednih potreba. U operativno tijelo se po pravilu mogu imenovati predsjednik, zamjenik predsjednika i sekretar, a ovisno o oblasti djelovanja i predsjednik odgovarajuće stručno-tehničke komisije.

Član 26.

Na sjednice Upravnog odbora se po potrebi pozivaju predsjednici stručno-tehničkih komisija, bez prava učešća u glasanju prilikom donošenja odluka. Upravni odbor tada zasjeda u proširenom sastavu.

Član 27.

Izbor Predsjednika Upravnog odbora se vrši tajnim glasanjem na Skupštini Udruženja između više predloženih kandidata. Za Predsjednika prioriteto se predlažu istaknuti volonteri, a izabran je onaj kandidat koji je dobio najveći broj glasova na važećim glasačkim listićima. Ako dva ili više kandidata za Predsjednika imaju isti broj glasova, izbor se vrši u drugom krugu.

Član 28.

Upravni odbor Udruženja obavlja sljedeće poslove:

1. priprema sjednice Skupštine;
2. priprema nacrt Statuta i drugih općih akata koje donosi Skupština;
3. provodi politiku, zaključke i druge odluke koje je donijela Skupština;
4. odlučuje o raspolaganju imovinom i materijalnim sredstvima Udruženja;
5. podosi izvještaje o radu Skupštini Udruženja;
6. prati realizaciju finansijskog plana Udruženja i donosi odluke o upotrebi sredstava.;
7. imenuje predstavnike Udruženja u međunarodnim udruženjima;
9. obavlja i druge poslove predviđene Statutom i aktima Udruženja.

Član 29.

Članovi Upravnog odbora mogu biti opozvani i prije isteka vremena na koje su izabrani i to:

- na sopstveni zahtjev;
- ako ne dođu na sjednicu tri puta uzastopno (bez opravdavajućih razloga);
- ako svojim radnjama u vezi sa radom Upravnog odbora ruši ugled Udruženja;
- u drugim slučajevima predviđenim Zakonom, ovim Statutom i aktima Udruženja.

O opozivu člana Upravnog odbora odlučuje Skupština Udruženja većinom glasova.

NADZORNI ODBOR

Član 30.

Nadzorni odbor čine predsjednik i dva člana koje bira i razrješava Skupština. Mandat predsjednika i članova Nadzornog odbora je dvije godine, sa mogućnošću reizbora.

Radi zaštite i ostvarivanja prava udruženih organizacija i članova, Skupština Udruženja imenuje Nadzorni odbor, kao organ interne kontrole, a u cilju praćenja zakonitosti u radu.

Nadzorni odbor je ovlašten da vrši kontrolu i svih dokumenata koji se odnose na finansijsko poslovanje, ugovora kojima Udruženje preuzima finansijske obaveze, kontrolu stanja na računima Udruženja, kontrolu periodičnih i godišnjih obračuna Udruženja.

O zakonitosti finansijskog poslovanja Udruženja i o svome radu, Nadzorni odbor izvještava Skupštinu Udruženja najmanje jednom godišnje.

Član 31.

Nadzorni odbor se sastaje po potrebi, najmanje dva puta godišnje. Nadzorni odbor donosi odluke većinom glasova prisutnih članova.

Član 32.

Ocjene, stavove, mišljenja i prijedloge Nadzorni odbor utvrđuje većinom glasova članova Nadzornog odbora. Nadzorni odbor obavezno podnosi izvještaj Skupštini o svom radu, a u slučaju da utvrdi teže povrede zakonitosti, može Skupštini predložiti odgovarajuće mjere, odnosno, sankcije iz nadležnosti Udruženja.

V - PRAVILA ZA OSTVARIVANJE, KORIŠTENJE I RASPOLAGANJE SREDSTVIMA UDRUŽENJA, KAO I ORGAN KOJI JE OVLAŠTEN ZA NADZOR NAD KORIŠTENJEM TIH SREDSTAVA

Član 33.

Imovinu Udruženja čine: prava, stvari i novac koje Udruženje stiče u skladu sa Zakonom i ovim Statutom. Za obaveze prema trećim licima, Udruženje odgovara cjelokupnom imovinom.

Član 34.

Udruženje može sticati prihode iz sljedećih izvora:

- članarine
- dobrovoljnih priloga i poklona javnih institucija, fizičkih i pravnih lica, kako u gotovini, tako i u imovini i uslugama
- ugovora sa državom, javnim institucijama, fizičkim i pravnim licima
- bankovnih kamata
- prihoda stečenih kroz ostvarivanje ciljeva i aktivnosti Udruženja u skladu sa ovim Statutom (izdavačka djelatnost, organizacija seminara, itd.)
- drugih izvora u skladu sa važećim zakonima.

Član 35.

O sticanju prihoda, korištenju imovine i raspolaganju sredstvima Udruženja, odlučuje Upravni odbor, u skladu sa ovim Statutom i općim aktima Udruženja.

Član 36.

Udruženje je dužno uredno voditi poslovne knjige u skladu sa prihvaćenim računovodstvenim principima i sastavljati finansijske izvještaje saglasne važećim principima.

Član 37.

Upravni odbor je dužan, najmanje jednom godišnje, podnijeti Skupštini Udruženja izvještaj sa podacima o imovini Udruženja, korištenju imovine, prihodima i rashodima Udruženja i drugim pitanjima od značaja za raspolaganje imovinom i za finansijsko poslovanje Udruženja.

Član 38.

Kontrolu finansijskog poslovanja Udruženja vrši Nadzorni odbor, na način utvrđen ovim Statutom.

Član 39.

Upravni odbor ovlašćuje dva člana Upravnog odbora za potpisivanje akata koji se odnose na sticanje i raspolaganje imovinom Udruženja i na finansijsko poslovanje.

Član 40.

Obavljanje stručnih, organizacionih, finansijsko-računovodstvenih, administrativno-tehničkih i drugih poslova za potrebe Udruženja, može se povjeriti stručnim osobama. Udruženje može i samostalno formirati odgovarajuću stručnu službu, što se reguliše posebnom odlukom Upravnog odbora.

Član 41.

Za ažurno stručno i dosljedno izvršavanje poslova iz prijedlognog člana, odgovoran je Sekretar Udruženja.

VI - JAVNOST RADA

Član 42.

Rad organizacije i organa Udruženja je javan. Javnost rada Udruženja obezbjeđuje javnim karakterom sjednica svojih organa, dostupnošću materijala i drugih akata o kojima se odlučuje, organizacijama i organima, kao i svim zainteresovanim članovima i sredstvima javnog informisanja.

VI - POSTUPAK ZA IZMJENU I DOPUNU STATUTA, OVLAŠTENJE I NAČIN DONOŠENJA DRUGIH OPĆIH AKATA

Postupak izmjene i dopune Statuta

Član 43.

Incijativu za izmjene i dopune Statuta može podnijeti svaki član Udruženja. Incijativa se podnosi Upravnom odboru, pismenim putem i sa odgovarajućim obrazloženjem.

Član 44.

Izmjena i dopuna ovog statuta vrše se na način i po postupku za njegovo donošenje.

Prijedlog za izmjene i dopune Statuta utvrđuje Upravni odbor. Utvrđeni prijedlog dostavlja se Skupštini Udruženja, pismenim putem i sa odgovarajućim obrazloženjem, najmanje 30 dana prije dana održavanje sjednice Skupštine.

Skupština kao najviši organ Udruženja usvaja izmjene i dopune statuta i donosi ostale akte koje su važne za nesmetan rad Udruženja.

Statut, izmjene i dopune statuta, i drugih akata Udruženja usvaja skupština dvotrećinskom većinom prisutnih članova na skupštini Udruženja.

Opći akti Udruženja

Član 45.

- Pored Statuta, organi Udruženja mogu donositi i neke druge opće akte i to:
- odluke,
 - pravilnike i
 - poslovnike.

Opći akti moraju biti saglasni Zakonu i Statutu Udruženja.

Član 46.

Odluke, kao opći akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opći način uređuju pitanja od značaja za ostvarivanje ciljeva Udruženja.

Član 47.

Pravilnikom se na opći način uređuju odnosi između članova Udruženja, kao i međusobni odnosi organa Udruženja u ostvarivanju njihovih nadležnosti.

VIII - OPIS OBLIKA I SADRŽAJ PEČATA

Član 48.

Pečat Udruženja je okruglog oblika, prečnika od 30mm, sa punim nazivom Udruženja upisanim latinicom i ćirilicom. U središnjem dijelu, pečat sadrži znak Udruženja.

IX - ZASTUPANJE UDRUŽENJA

Član 49.

Udruženje građana « Interkulturni susreti u Bosni i Hercegovini» zastupa i predstavlja Predsjednik Udruženja, a u njegovoj odsutnosti, Skupština može odrediti drugo lice za zastupanje i predstavljanje Udruženja kao i granice ovlaštenja.

**X - USLOVI I POSTUPAK ZA PRIPAJANJE, RAZDVAJANJE,
TRANSFORMACIJU ILI RASPUŠTANJE, ODNOSNO, PRESTANAK RADA
UDRUŽENJA**

Član 50.

Udruženje može biti član drugih internacionalnih udruženja i preduzeće, koji imaju iste ili slične ciljeve, na osnovu Ugovora o udruživanju.

Član 51.

Udruženje može na osnovu zajedničkog interesa udruživati se i sa drugim asocijacijama i organizacijama u i izvan Bosne i Hercegovine, prvenstveno u oblasti međunarodne razmjene učenika i nastavnika, ali i srodnim oblastima.

Član 52.

Udružene članice i organizacije imaju jednaka prava i obaveze utvrđene ovim Statutom ili Ugovorom o udruživanju.

Član 53.

- Udruženje prestaje sa radom:
- kada Skupština Udruženja dvotrećinskom većinom glasova prisutnih zastupnika donese odluku o prestanku rada Udruženja;
 - u slučajevima predviđenim Zakonom.

**XI – POSTUPAK ZA RASPOLAGANJE PREOSTALOM IMOVINOM ILI
DRUGIM SREDSTVIMA U SLUČAJU RASPUŠTANJA ILI PRESTANKA RADA
UDRUŽENJA**

Član 54.

U slučaju prestanka rada, sva imovina Udruženja se prenosi na raspolaganje i upravljanje organizaciji koja nastavlja njen rad. Ukoliko takva ne postoji, imovina se raspoređuje osnovnim organizacijama članicama. Odluku o tome donosi Skupština.

XIII - PRELAZNE I ZAVRŠNE ODREDBE

Član 55.

Pitanja od interesa za udružene organizacije, koja nisu regulisana ovim Statutom, regulišu drugim normativnim aktima i odlukama Upravnog odbora.

Član 56.

Ovaj Statut stupa na snagu danom usvajanja na Osnivačkoj Skupštini Udruženja, a primjenjivat će se od dana upisa Udruženja u Registar kod nadležnog Ministarstva.

Sarajevo, 20.02.2004.
Br. 02/04

Predsjedavajući Osnivačke
Skupštine
